

自出門先觀放印車子有霞光五道上通徹天有丹藥五粒行持人頂禮五方託取藥服之取盆中淨水不要潑了收藏蓋之然後收獻食菓子茶湯不得與人食如不食傾在長流水中後收地上物色遺下金寶珍翠內有人間不識之寶搜尋有不獲之物四遠更尋偏方位收拾餘物寶貨濟施貧寒之人不得非禮破用分作三分一分自身贈道一分設醮謝神一分施貧廣積功行於人間庶可以消此之物其兩盆淨水是受聖人真炁通靈沐浴自身即使身輕更服丹藥可為在世神仙也驅使六甲六丁之神善使十二溪女那延天女驅使三員大將此水若不用沐浴故之淨處勿得棄置若至百自有靈變成甘露此水能治萬病如有年老髮白齒落耳聾目昏體瘦用此水洗頭便生黑髮齒落用此水嗽口再生細齒而敏重舒耳聾者用水滴耳中兩耳立聰有患眼人用此水洗目立便如舊再見光明若一切病患無藥可治

者服此水二口立便安痊若傷刀中前用此水洗瘡便無痕痕也如人雕青先用布擦動青處用此水洗之立便不見痕跡若新死人用此水半盞灌下咽喉立便活也如有婦人懷孕服此水半盞是男聰明智慧是女端正有貌若有傷寒不汗但服此水一兩口即便汗出安痊若邪鬼着人法師遣不得者令患人服水一口更令行法入用水二口喫之其鬼通傳姓名要去便與清漿冷飯送之其鬼即去也如有惡瘡用此水洗之立便安也中毒藥者服此水立解此是天中衆聖返魂甘露水也行法人救治萬病切忌不得取人一文錢物若飲食之類無妨受人錢物即無功行也若能依戒必昇天仙召請五帝君三官五星欲求七祖生天或求丹藥服之用此壇三年二次請之不得常行請召

上青六甲祈禱秘法

貫斗忠孝五雷武侯秘法序

五七

旭陽葆光 真士具昇拱

天地設位而易行乎其中道在天地而法立乎無外二儀四象陰陽五根八卦九章經緯錯綜神妙萬物氣機殊異雷城指十二之門吉凶有在斗柄列九六之位生殺攸司曰惟至人握造化之樞機知鬼神之情狀斯可去邪勿貳惟精惟一而志於道焉元至元間荆門貢士暉齋張公先生以通經教授其鄉館人之家漁江中得圓石瑩淨可愛拾置堂與先生夜坐視之有光燁煌乃捐館俸買而歸剖之中有方石似鏡二面有文刻剔洗挾刻畫繁若模墨印之至數百幅舉火燎之煙氣鬱勃先生愕然驚駭及寐俄見有神英姿颯爽羽鬚綸巾頎然突前揮鐵如意曰子聞漢有諸葛孔明乎帝命我為通天煞伐烈雷大神此陰陽神印也子既得之當助道揚法遇有山魈石崇土木精邪妄入人家殃害生民以神印撥我忠孝雷兵按神馬路書一坎二坤三震四巽五中六乾七兌八艮九離定位

按節候陰陽逆順以焚之起坎終離起離終坎所謂雷風水火搏射而精邪絕蹟矣書以授予子其寶之先生寤踴躍起拜敬受其書乃棄俗入武當山從道參究天心正法福國康民聲聞朝野大德中錫封隱真玄陽真人坐南巖飛昇其徒建祠宇嚴祀請于朝賜額昇真觀後二年雷電閃爍神印飛去火鈴全陽趨真人以雷劈桑木傳刻箴法江湖於玉笥立化再傳谷陽黃真人其法益著天曆出尹山陽至正辛卯新穎兵起歸隱洪都西山已酉上元危坐仙化吾少也獲侍教焉茲不昧其善世不伐之功濟人利物之行且以武侯名成八陣功蓋三分一體君臣昭曠青史知進退存亡不失其正深達乎大易法象之蹟微也百世之後猶以勇烈正直命于帝庭敷于下土渙汗大號屏斥妖魔濯濯靈澤祥在上吁可畏也敢不敬乎

貫斗忠孝五雷武侯秘法

主法

主法九天大行理格真玄女元君

主將

九天助道揚法勇烈正直通天煞伐烈雷大神都統兵大將軍南陽忠武英烈侯諸葛孔明諱亮

副將

陰雷副將前將軍關羽

副將

陰雷副將右將軍張飛

陰雷副將左將軍黃忠

陰雷副將征西大將軍馬超

陰雷副將虎威將軍趙雲

將班

天蓬三十六雷大將

七十二陰雷大將

六丁六甲元帥

十七神王五虎猛將

九官八門八陣雷兵

五方通甲鐵甲鐵印官將

五方生炁旺炁煞炁死炁金木水火土五雷

帥將

年龍月將神君

七十二候二十四炁神君

直年直月直日直時除邪輔正合司將吏

八方霹靂忠孝雷兵

名役儀式 先三淨呪次念

天清靖地寧寧六丁六甲斬妖精敢有不順

吾道者天蓬真君威汝形道香一炷十方肅

清法敷三通萬神聽令以今焚香開召直日

直符使者六丁六甲神吏侍請素女直壇土

地為吾齋此信者騰誠上奏

主法九天大行理格真玄女元君火速勅召

主將殺伐烈雷大神都統大將軍陰雷副將

前將軍關羽陰雷副將右將軍張飛陰雷副

將左將軍黃忠陰雷副將征西大將軍馬超

陰雷副將虎威將軍趙雲下赴壇前有事指

揮

變神 天皇大帝速變吾神吾為雷使統攝雷兵驅